

四庫全書

集部

欽定四庫全書

集部

文選補遺卷一

詳校官中書臣丁榮祚

助教臣常循履勘

總校官中書臣朱 鈐

校對官中書臣方天川

謄錄監生臣許立學

欽定四庫全書

集部八

文選補遺

總集類

提要

臣等謹案文選補遺四十卷宋陳仁子撰仁子有牧萊脞語已著錄是書前有廬陵趙文序述仁子之言謂文選存封禪書何如存天人三策存劇秦美新何如存更生封事存魏公九錫文何如存蕃固諸賢論列出師表不

當刪去後表九歌不當止存少司命山鬼九章不當止存涉江漢詔令取武帝不取高文史論贊取班范不取司馬遷淵明詩家冠冕十不存一二又不當以詩賦先詔令奏疏使君臣失位質文先後失宜其排斥蕭統甚至蓋與劉履選詩補注皆私淑文章正宗之說者然正宗主于明理文選原止于論文言豈一端要各有當仁子以彼概此非通方之論

也且所補司馬談六家要旨論則齊黃老千  
六經魯仲連遺燕將書則教人以叛主高帝  
鴻鵠歌情鍾嬖愛揚雄反離騷事異忠貞蔡  
琰胡笳十八拍非節烈之言越人歌李延年  
歌直淫褻之語班固燕然山銘實為貢諛權  
臣董仲舒火災對亦不免附會經義律以正  
宗之法皆為自亂其例亦非能恪守真氏者  
至于宋王微咏賦詔為宋玉微咏賦則姓名

時代並訛引佛經橫陳之說以註諷賦則龐  
雜已甚荆軻易水歌與文選重出亦為不檢  
觀所著牧萊脞語於古文時文之格律尚未  
甚分明則排斥古人亦貿貿然徒大言耳然  
其說云補文選不云竟以廢文選使兩書並  
行各明一義用以濟專尚華藻之偏亦不可  
謂之無功較諸舉一而廢百者固尚有間焉

乾隆四十四年三月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

史  
選  
補  
遺

[illegible]



文選補遺原序

子在陳曰歸與歸與吾黨之小子狂簡斐然成章不知所以裁之所謂成章者庸知其非著書立言之謂蓋歸而刪詩定書贊易作春秋正禮樂以垂世立教所以裁之者在此矣聖師既沒諸子百家驚於立言或著書或為文使有聖喆出而裁之取其合者去其離者以清天下之耳目而能言者亦得以自見豈非後學之深幸惟無人以任斯責而後言語文字爛漫四出於天下涉戰

國秦漢魏晉六朝其傳不傳何可勝道蕭統索古今文  
士之作築臺而選三十卷雖其去取不免失當然收拾  
於散亡微統之力不及此作者之得傳後人之得有所  
見詎可謂統盡無功哉有志斯文者補之正可也而承  
襲蘓氏之說便相詆訾亦不恕哉吾友陳同甫少講學  
家庭閱文選即以網漏吞舟為恨以為存封禪書何如  
存天人三策存劇秦美新何如存更生封事存魏公九  
錫文何如存蕃固諸賢論列出師表不當刪去後表九

歌不當止存少司命山鬼九章不當止存涉江漢詔令  
載武帝不載高文史論贊取班范不取司馬遷淵明詩  
家冠冕十不存一二又以為詔令人主播告之典章奏  
疏人臣經濟之方略不當以詩賦先奏疏矧詔令是君  
臣失位質文先後失宜遂作文選補亦起先秦迄梁間  
以先儒之說及其所以去取之意附於下方凡四十卷  
此書傳非特蕭統忠臣而三代以後君臣政治之典章  
輔治之方畧皆可考見而為世教民彝之助不細文云

乎哉而同甫猶未欲出其書疑所藏未備選未盡也余  
曰舉爾所知而已矣何必博之求哉於是同甫慨然出  
是書刻之不靳同甫好學有志之士既成是書又將取  
蕭統以後迄于今作文選續以廣文粹文鑑之未備書  
成尚當以余文托君不朽廬陵趙文序

欽定四庫全書

文選補遺卷一

元 陳仁子 輯

詔詰上

史中子曰漢制詔冊幾乎典詰矣又曰五帝之典三王之詰兩漢之制粲然可見矣又曰

制其盡美於卹人乎○晦菴朱熹曰三代之訓詰誓命皆根源學問敷陳義理粲然可為後世法泰漢以下詔令何所發明惟高帝之詔差愈然已不純如曰肯從我游者吾能尊顯之此豈所以待天下士○西山真德秀曰以三帝三王律之識如文公之說自後世言之兩漢詔令猶有惻怛愛民實意辭氣藹然深厚爾雅蓋有古之風烈○愚曰古者詔詰本以通彼此相與之情後世詔詰乃以嚴

上下相臨之分○又曰國家詔令最關運祚商盤三篇優游委曲穆若清風識者知其培六百年之基周諮諸書忠厚惻怛沃若甘雨識者知其兆八百年之業史臣論孝武號令文章粲然可述元帝號令溫雅有古風烈賈山言吏布詔山東父老扶杖願往觀王吉言詔令每下民欣若更生三代而下其庶乎享國四百年宜也○又曰漢詔多散語唐以來詔多儼語散語猶盤詰遺風儼語去古遠矣

入關告諭

此非可言詔亦告詔之始○唐仲友曰不殺子嬰約法三章此事全好最得天

下根本楚漢得失全在於此項羽一切反是○西山真德秀曰告諭之語財百餘言而暴秦之弊為之一洗所謂若時雨降民大悅也○愚曰聖王舉兵別有一義為公不為私為天下不為

一身大要在解民所不堪而投之其所好是故君子論是非小人論利害伯夷不食周粟以是非論也商郊匪厥玄黃以利害論也勝廣所以紛紛者皆不堪秦法故也高帝約法三章為父兄除害誅以所好而解其不堪是非未見利害瞭然秦漢興亡決此數語矣○或問周刑三千漢約三章何漢勝於周也曰秦法以繁漢法以簡此高帝反秦救弊之一術也未幾蕭何益事律有興律廢律戶律三篇總為九章叔孫通又益律所不及傍章十八篇其後律令凡三百五十九章大辟四百九條千八百八十二事死罪決事比萬三千四百七十二事非先後詳略之相反也立國滋久法滋繁矣作法於涼其弊猶貪作法於貪弊將若何初可不慎哉

## 漢高帝

本紀諱邦字季沛豐邑中陽里人秦二世元年秋陳涉起兵攻秦父老立為沛

公○漢元年十月至霸上  
十一月詔諸縣豪傑云云

父老苦秦苛法久矣誹謗者族耦語者弃市吾與諸侯  
約先入關者王之吾當王關中與父老約法三章耳殺

人者死傷人及盜抵罪

抵當也

餘悉除去秦法吏民皆按

堵如故

按按次第堵牆堵也

凡吾所以來為父兄除害非有所侵

暴毋恐且吾所以軍霸上待諸侯至而定約束耳

乃使人與

秦吏行至縣鄉邑告諭之秦民大喜爭持牛羊酒  
食獻享軍士沛公讓不受民益喜惟恐不為秦王

告為義帝發喪

晦菴朱熹曰三軍編素為義帝發喪使湯武當此時必是做得好○



南軒張栻曰惟仁義足以得天下之心三王是也高祖入關諸老將已謂沛公素寬大長者而心歸之至三章之約其得民者深矣此非所謂仁者與余每愛三老董公之言以為順德者昌逆德者亡兵出無名事故不成名其為賊敵乃可服三軍之衆為義帝稿素聲項羽之罪而討之於是五十六萬之師不謀而來從義之所感也使斯時高帝不入彭城置酒高會率諸侯窮羽所至而誅之天下即定矣惜其誠意不篤不能遂收湯武之功然漢卒勝楚卒亡者良由於此名正義立故也董公蓋深知其理故其言又曰仁不以勇義不以力自留侯而下陳謀雖多而皆不之及嗚呼董公者其一時之逸民與○愚曰天下事自有是非曲直惟處於事外者得之而處其中者不覺也故常人視為迂君子視為要且如高祖所以無愧湯武者三一則乘人心

之思起匹夫而攻秦二則因英雄之爭從豐沛而起應三則因羽弑義帝之後始據關中而自立較之操懿為臣而篡竊者不同董公遮說蓋是間處見理明白遂以有天下董公功蓋為興漢第一義按楚漢春秋載董公年八十二封成侯宜也而史記功臣表一百四十三人班史高帝功臣一百四十七人獨董公不言何也○又曰高祖於義帝始厚而終薄初取天下稿素何其厚既得天下追遠何其薄當時下令曰楚地已定義帝亡後帝亦念及此矣如秦皇帝楚隱王魏安釐王趙悼襄王皆置守冢獨義帝不置田橫改葬獨義帝不改葬又不祠以大牢彼讐我者尚如此況義帝者我嘗北面臣之乎昔楚人滅江秦伯為之降服出次君子議為非真吾意帝稿素一舉持迫於取天下而屈於董公之說其亦假之而非真也夫

# 漢高帝

本紀二年三月至洛陽新城三老董公遮說漢王曰臣聞順德者昌逆德者亡

兵出無名事故不成故曰明其為賊敵乃可服項羽為無道放殺其主天下之賊也夫仁不以勇義不以力三軍之衆為之素服以告之諸侯為此東伐四海之內莫不仰德此三王之舉也王曰善非夫子無所聞於是漢王為義帝發喪袒而大哭哀臨三日發使告諸侯云

天下共立義帝北面事之今項羽放殺義帝江南大逆

無道寡人親為發喪兵皆縞素悉發關中兵收三河士

河南河東河內

南浮江漢以下願從諸侯王擊楚之殺義帝者

# 罷兵首詔

東萊呂祖謙曰此還定安集之大政也○又曰古者良賤有定品良者世為良賤者世為賤以飢餓自賣者本良人也既非氣類之本卑又非刑律之收坐不幸兵荒而陷身於此遂將為百世賤人尸此責者其誰乎高帝之詔可謂真知作民主之職矣○愚曰古者王政明故以智役愚後世王政廢故以貴役賤噫苟至於彼此之相役則亦窮矣古制無奴婢周禮奚三百人傳者以為從坐男女没入縣官為奴婢其少材智者為奚蓋三代井田存民養生送死無憾非有罪及逃亡所獲則誰甘為與臺皂隸者後世井田廢民力不均凶荒天札之政缺至窘急則自賣為奴婢如春秋越石父不免以貧為僕豈其心哉高帝即位罷兵歸家留念及此蓋與成湯歸亳寬仁彰信武王歸馬發粟散財同一意較之秦皇以氣力得國全不念民

者不同矣。惜帝有仁心，未復仁政，則免於暫者，其能久乎？

漢高帝

本紀五月兵皆罷歸家，詔曰：

諸侯子在關中者，復之十二歲。

復方目反，謂諸侯國人若楚子之類。

其歸

者半之。

各已還本土者，復六歲。

民前或相聚，保山澤，不書名數。

守保

以避難也。名數謂戶籍也。

今天下已定，令各歸其縣，復故爵田宅。

復還

也。扶目反，故爵秦所賜爵。

吏以文法教訓，辨告勿笞辱。

辨告者分別義理曉諭文

法謂逃亡欲書名數之罪。

民以飢餓，自賣為人奴婢者，皆免為庶人。

軍吏卒會赦，其亡罪而亡爵及不滿大夫者，皆賜為大

夫

軍吏卒會赦得免罪及本無罪而無爵級者皆賜爵

為大夫大夫第五爵也劉放曰有罪者會赦免罪而

已不得賜爵也亡

故大夫以上賜爵各一級

就加之也

其七大夫以上皆令食邑

秦制列侯乃得食邑今七大

夫也爵第七

非七大夫以下皆復其身及戶勿事

不輸

也事役使

也復其身

令諸吏善遇高爵詔

愚曰先儒嘗言秦之亡吏不

漢尚厚故吏亦厚嘗考晁錯論秦吏先侵貧人

賤民中侵富人吏家末侵宗室大臣親疎皆危

天下大潰其酷如此今讀高帝所詔七大夫爵

第七公乘爵第八而吏猶持之况孱弱小民不

能自立者乎凡此者秦吏之餘也帝自泗上亭  
長詣之熟矣一戒飭間意向立變曾未易世若  
其公治平為天下第一有不盡載循吏傳者甚  
多秦以吏不肖而亡漢以吏稱職而久誰謂高  
帝不老於  
謀國哉

漢高帝

本紀  
五月

七大夫公乘以上皆高爵也諸侯子及從軍歸者甚多  
高爵吾數詔吏先與田宅及所當求於吏者亟與爵或

人君上所尊禮

人君謂自君其  
人上謂天子

久立吏前曾不為決甚

亡謂也異日秦民爵公大夫以上令丞與亢禮

亢當  
也

今

吾於爵非輕也吏獨安取此且法以有功勞行田宅

行

酒之行猶付與也

今小吏未嘗從軍者多滿而有功者顧不得

顧反也

背公立私守尉長吏教訓甚不善其令諸吏善遇

高爵稱吾意且庶間有不如吾詔者以重論之

廉察也字本作

規

尊太公曰太上皇詔

劉涇曰自天子至於庶人同乎一本太公擁篲迎門卻行

家令之言欲伸天子威重耳不知威重伸而孝悌滅高祖天姿戲儒遂以君之嚴施之父子天性之際外雖不從內實喜之太公僅免机上肉耳此之三代之君厥有慙德哉○懶真子錄唐



宰相世系表叙劉氏所出云晉士會適秦歸晉  
有子留於秦自為劉氏秦滅魏徙大梁生清徙  
沛生仁號豐公生煇字執嘉生四子伯仲邦交  
邦漢高帝也○愚曰孝在心不在名夫太上皇  
號始自秦尊莊襄非古也帝即位紀水至歸櫟  
陽凡六年稷嗣君通勸上尊號曰后曰太子曰  
先媼悉尊之獨置太上皇遲遲不言猶曰名號  
非古可也獨是爭天下之初寧免貽憂其父索  
囚楚軍牢落萬狀昭靈之痛未酬杯羹之言何  
忍以家易國以親易富貴恐非殺一不辜得天  
下不為之心也帝幸得之宜俯伏庭下引咎謝  
過之不暇一切歸尊其父而已不與曾未嘗一  
語自責未央上壽不以天下養而更驕之何也  
況五日一朝比朝王季日三者何如擁篲卻行  
此祇載見替股夔夔齋慄者又何如家令從諛  
之言長此不已南內淒涼於輔國無怪也帝至

是名與心  
俱有慚矣

漢高帝

本紀六年上歸櫟陽五日一朝太公太公家令說太公曰奈何令人主拜人臣

後上朝太公擁篲迎門卻行  
上心善家令言五月詔云云

人之至親莫親於父子故父有天下傳歸於子子有天下尊歸於父此人道之極也前日天下大亂兵革並起萬民苦殃朕親被堅執銳自帥士卒犯危難平暴亂立諸侯偃兵息民天下大安此皆太公之教訓也諸王通侯將軍羣卿大夫已尊朕為皇帝而太公未有號今上

尊太公曰太上皇

太上極尊之稱也天子之父故號曰皇不預國政故不言帝

獄讞詔

西山真氏曰按刑法志上恩如此吏猶不能奉宣故孝景中五年後元年下詔云云

自此以後獄刑蓋詳近於五聽三宥之意○東萊呂祖謙曰高帝明恤庶獄簡而要大而周可謂知君道矣郡國二千石所能斷者既下縣道論決其不能決而上之廷尉者蓋無幾矣廷尉所能斷者既下郡國論決其不能決而奏之天子者蓋絕無而僅有矣體統既明不待衡石程書齋居決事而天下自無一夫之寃矣彼秦皇漢宣之流矜其小慧悉取四方之奏讞而自治之有司拱手倚成於上積棟充宇豈區區兩目所能偏察哉○愚曰疑獄最難言也罪疑惟輕舜決疑獄也百辟之疑有赦穆王決疑獄也高帝多因秦法疑獄讞雖未必復三代之制特

初除煩苛再詔讞決意亦可尚高帝疑之之深而讞宜文帝疑之之甚而輕也所可恨者彭越韓信皆罹蒞臨之酷藥布前通幾及鼎烹之禍又不知讞者何事所傳何律乎

漢高帝

本紀七年  
制詔御史

獄之疑者吏或不敢決有罪者久而不論無罪者久繫不決自今以來縣道官獄疑者各讞所屬二千石官二千石官以其罪名當報之所不能決者皆移廷尉亦當報之

當謂處  
斷也

廷尉所不能決謹具為奏傳所當比律令

以聞

定口賦詔

愚曰漢規模近古制度全不如古夫欲定口賦莫若先定田制漢去古未遠井

田之迹可尋當時都關中乃秦初變阡陌之地也朝夕聞見宜獨忘之天下既定追尋古制始自關中次及天下則漢其三代矣今改秦法而不改阡陌定口賦而不定井田戶口多者獻亦多戶口少者獻亦少是放飯流歠而問無齒決也漢由是不可語三代

漢高帝

本紀十一年二月

欲省賦甚今獻未有程

程法式也

吏或多賦以為獻而諸侯

王尤多民疾之令諸侯王通侯常以十月朝獻及郡各以其口數率人賦六十三錢以給獻費

求賢詔

南豐曾鞏曰漢高帝平時侮慢學士大夫至取儒冠溺之所與共成功者多貶繒屠

狗之徒及天下既平乃屈意求賢如恐不及蓋知創業與守成異也其後高祖欲易太子張良為召至四皓從太子遊高祖見之遂不復易然則賢人有補於國家如此有天下者顧可忽哉○止齋陳傅良曰高祖取天下人才常不盡為義帝鵠素乃董公之策破黥布乃薛公之策定太子乃四皓之策皆因事畧見於後世若田橫死士五百人陳豨從車千乘魯兩生齊蓋公東郭先生黃石君楚穆生白生申公其功名皆不見於後世是時去戰國未遠天下人才最多四皓兩生蓋公穆生皆帝王之佐高祖固不能屈若奇才異士所在無限帝亦不能盡致也且趙王張敖羣臣田叔孟舒等十餘人已非漢廷羣臣所及況他者乎○愚曰高帝求賢亦有所觸

而畏也蓋自陳平多詐迎合叔孫通變儒服謁見而帝不知天下有不可臣之賢自利幾貫高竊謀田叔魏舒召見而帝始知天下有不可道之才十一年詔下求賢帝更變多而慮益老矣羽未平則患在羽羽既平則患在匈奴匈奴既平則患又在趙代事變捷出叛者九起而人材迭出與漢角求賢之詔畏心已甚大風之歌畏心愈深又至子房招四皓而說則畏心若釋重負矣○或曰武帝求跡跡之詔視高如何曰高帝以畏心求賢故能安漢武帝以侈心求賢故幾亡漢此所以不同○又曰高帝定天下之後尊賢樂道極有好處若過魯祠孔子以太牢過淮南置魏公子無忌守冢遇趙封樂毅後直有撫髀古名勝之心平日嫚罵之風殆雪消冰泮所過者化矣獨怪當時魯有兩生楚有白生穆生齊有蓋公伏生趙有郎中田叔孟舒十人代

陳豨有從車千乘高帝皆不得用蓋吾能尊顯一語帝直以爵祿驕天下士宜賢士不為用也噫此猶可諉也申公曾見帝於魯而不之用何哉

漢高帝

本紀十一年

蓋聞王者莫高於周文伯者莫高於齊桓皆待賢人而成名今天下賢者智能豈特古之人乎患在人主不交故也士奚由進今吾以天之靈賢士大夫定有天下以為一家欲其長久世世奉宗廟亡絕也賢人已與我共平之矣而不與吾共安利之可乎賢士大夫有肯從我



遊者吾能尊顯之布告天下使明知朕意御史大夫昌

下相國相國鄼

贊

侯下諸侯王御史中執法下郡守

中執

法中丞也西山謂此詔令頒行之次第

其有意稱明德者必身勸為之駕

郡守自往勸勉駕車遣之

遣詣相國府署行義年有而弗言覺免年

老癯病勿遣

立南粵王詔

愚曰國天下者貴識天下之大勢高帝善有天下蓋識其勢者也當時吏

民新附叛者九起故北不刷白登之恥南不貪百粵之臣直以一身為天下之勢虜藏茶破利幾執淮陰繼而貫高反洛陽陳稀反代燕布又反淮南所幸兵力不分旋起旋定若窮征遠伐

變不旋踵恐鞭長不及馬腹天下匈匈非吾有也隋攻高麗而江都之盜乘之唐攻南詔而漁陽之叛乘之帝識天下之勢而封南粵至此知高帝之慮遠矣

### 漢高帝

本紀十一年五月○漢書初秦南海尉任囂病且死召龍川令趙佗語曰秦為

無道天下皆苦之南海東西數千里頗有中  
國人相輔此亦一州之主也可以立國即被  
佗書行南海尉事囂  
死佗立為南越武王

粵人之俗好相攻擊前時秦徙中縣之民南方三郡中

縣民也始皇畧取強梁地以為  
桂林象郡南海郡故曰三郡

使與百粵相處

欲以介其間使

不相會天下誅秦南海尉佗居南方長治之甚有文理  
攻擊

中縣人以故不耗減粵人相攻擊之俗益止俱賴其力

今立佗為南粵王

使陸賈即授璽綬佗稽首稱臣

議犯法相坐詔

西山真氏曰文帝元年十月即位十二月下此詔蓋即位後第二詔

也班氏載於刑法志史記書之本紀太史公書於高景二紀詔皆不書獨文帝紀凡詔皆稱上曰以其出於帝之實意故也不然則山東老癯扶杖聽詔願見德化之成其可以空言動邪○愚曰漢之不為秦以高帝之後繼以文帝也夫一人有罪併坐其家秦法也文帝不為秦而武帝似秦文帝除收斂諸相坐之令而武帝立見知故縱之法嗚呼漢高帝性本寬厚非文帝培植之深則斷喪於武帝者又一秦也故高帝能創天下而文帝能守天下

漢文帝

諱恒高祖中子在位二十三年壽四十  
六○刑法志漢興之初雖有約法三章

網漏吞舟之魚然其大辟尚有夷三族之令  
高后元年乃除三族之罪孝文二年又詔丞

相御史

云云

法者治之正所以禁暴而衛善人今犯法者已論而使

無罪之父母妻子同產坐之及收朕甚弗取其議之

左右

丞相周勃陳平奏言父母妻子同產相坐及收所以繫  
其心使重犯法也臣愚以為如其故便文帝復云云

朕聞之法正則民慤罪當則民從且夫牧民而道之以

善者吏也既不能道又以不正之法罪之是法反害於

民為暴者也朕未見其便宜熟計之

平勃乃曰陛下幸加大惠天下使罪

不收無罪不相坐甚威德臣等不及謹奉詔盡除收律相坐法

### 答有司請建太子詔

東萊呂祖謙曰按景帝紀注景帝年三十二即位然則文

帝之元年景帝方十歲耳平勃所以亟請建太子者懲惠帝繼嗣不明之禍也文帝所以固讓者蓋踐阼之始懼不克勝所言皆發於中心非好名也○西山真氏曰按上曰以下疑是面諭有司之語有司固請乃以子啟為太子時帝即位纔數月有司之建白文帝之謙讓皆可為後世法○愚曰文帝有天下而不與其始也不以天下私其身其終也不以天下私其子帝自代郡來解讓再三初無一毫垂涎鼎璽之心最是卑詞而和劉奴軟語而諭南粵視名位直將免

馬其不有天下之心如此有司請建太子而帝曰別擇賢彼豈為其私哉後立景帝特以身履諸呂之變不容不早定耳西漢有帝王氣象文帝一人而已

漢文帝

本紀元年正月有司請蚤建太子所以尊宗廟詔云云

朕既不德上帝神明未歆饗也天下人民未有愜志

愜快

也今縱不能博求天下賢聖有德之人而嬪天下焉而

曰豫建太子是重吾不德也謂天下何其安之

有司曰豫建太

子所以重宗廟社稷不忘天下也上曰楚王季父也春秋高閔天下之義理多矣明於國家之體吳王於朕兄也淮南王弟也皆秉德以陪朕宜為不豫哉諸侯王宗室昆弟有功臣多賢及有德義者若舉有德以陪朕之

不能終是社稷之靈天下之福也今不選舉焉而曰必予人其以朕為忘賢有德者而專於予非所以憂天下也朕甚不取

### 議振貸及養老詔

愚曰仁未易言也三代以下論仁惟班固論文帝可以當之宜

也雖然仁有本有末曰賑貸曰養老曰賜租此末也和匈奴而不輕用兵惜露臺而不輕用民身衣弋絺而不輕用財此本也若帝日用兵若民若財雖今年賑貸明年養老又焉得人人悅之哉所可恨者獄周勃而無待大臣之仁殺薄昭而無待外戚之仁遷淮南厲王而無睦族屬之仁此瑜不掩瑕也若帝更盡善此雖孔聖亦以仁許之宜特固

### 漢文帝

元年三月

方春和時草木羣生之物皆有以自樂而吾百姓鰥寡

孤獨窮困之人或陷於死亡而莫之省憂

陷音玷孟曰陷音屋檐之

檐為民父母將何如其議所以振貸之

振起也俗從具非

又曰

老者非帛不煖非肉不飽今歲首不時使人存問長老

又無布帛酒肉之賜將何以佐天下子孫孝養其親今

聞吏稟當受鬻者

稟給也鬻淖糜也

或以陳粟宣稱養老之意

哉具為令

有司請令縣道年八十已上賜米人月一石肉二十斤酒五斗其九十已上又賜帛人二

匹絮三斤賜物及當稟鬻米者長史閭視丞若尉致不滿九十尚夫令史致二千石遣都吏循行不稱者督之



刑者及有罪罰  
以上不用此令

# 令列侯之國詔

止齋陳傳良曰遣列侯之國是為民轉輸勞苦非有他意因賈生說

○愚曰文帝令列侯之國高處有三一則自代來知餽餉之苦二則留京師孤弱收之任三則有緩急生肘腋之禍至於宴飲賜賞之濫又其餘者也深哉

漢文帝

二年十月

朕聞古者諸侯建國千餘各守其地以時入貢民不勞苦上下驩欣靡有違德今列侯多居長安邑遠吏卒給輸費苦而列侯亦無繇教訓其民其令列侯之國為吏

及詔所止者遣太子

為吏謂為卿大夫詔所止特以恩見留○明年十一月詔曰前日遣

列侯之國或詞未行丞相朕所重其為朕率列侯之國絳侯勃免丞相就國

日食詔

朱黼曰日食果天運乎抑人事乎曰天運而已而人事實行乎其間先儒知歷者謂

日之行也五月二十三分月之二十是為一交當朔則食交者其行道之險也然而或食或不食則陽氣之有強弱也食者其強不食者其弱也人事之修否而食不食隨之安得不關諸人事哉○愚曰日食者微在陽微主弱而臣強則食君子弱而小人強則食中國弱而夷狄強則食帝在位二十三年日食者四甚至孛星地震旱蝗大水層見疊出當時無主權之下移也無憐人之在朝也吾意微應匈奴強而入寇耳帝猶引躬責過所以無過也

漢文帝

二年十一月  
癸卯

朕聞之天生民為之置君以養治之人主不德布政不均則天示之災以戒不治乃十一月晦日有食之適諫

見於天災孰大焉朕獲保宗廟以微眇之身託於士民君王之上天下治亂在予一人唯二三執政猶吾股肱也朕下不能治育羣生上以累三光之明其不德大矣令至其悉思朕之過失及知見之所不及句以啟告朕及舉賢良方正能直言極諫者以匡朕之不逮因各敕

以職任務省繇費以便民朕既不能遠德故惻然念外

人之有非

憫下版切

是以設備未息今縱不能罷邊屯戍又

飭兵厚衛其罷衛將軍軍大僕見馬遺財足

遺留也今當減留纔

足充事而已

餘皆以給傳置

傳張變及置者置驛傳之

除誹謗詆言法詔

顏師古曰高后元年除詆言令今文有詆言之罪是中間曾復

設此條也詆妖同○致堂胡氏曰妖言令之始

設也必謂其搖民惑衆有姦究賊亂之意者及

其失也則暴君權臣假此名以警懼中外塞言

路也故賈誼論秦曰忠諫者謂之誹謗深計者

謂之詆言夫忠臣為上盡忠深計必剴切君身

探未然之事陳危亡之戒不止於近在目前者

自小人觀之曰是特揚君過以賣直未然之事  
危亡之形汝安得知殆誹謗詆訐耳此策行使  
中外之人鉗口結舌人君不聞其過淪於危亡  
而不悟然則其所謂謗者乃天下之患而其自  
為者乃天下之妖也夫既以忠諫深計為誹謗  
為妖言則指鹿為馬指野鳥為鸞指菌為芝指  
氛祲為慶雲指雹為非灾指慧曰所以除舊而  
布新也蝗虫則曰不食穀也日食則曰陰雲蔽  
之也地震則曰官府無傷也霖雨則曰秋稼自  
茂也水涌泛溢則曰民無流死者也歲饑則曰  
路未嘗有餓死者也凡賢否是非治亂得失一  
切反理危道倒言逆說之以欺惑世主使淪於  
亡其罪豈誹謗之比其為姦也不亦大乎嗚呼  
文帝除此令其享國長久宜哉○愚曰高后除  
詆言之令者實也惟其實故能受

漢文帝

本紀二  
年五月

古之治天下朝有進善之旌誹謗之木所以通治道而  
來諫者也今法有誹謗詬言之罪是使衆臣不敢盡情  
而上無由聞過失也將何以來遠方之賢良其除之民  
或祝詛上以相約而後相謾謾欺也初為要約共行祝  
詛後相欺詛中道而止無  
實事也謾音  
慢又莫連反吏以為大逆其有他言吏又以為誹謗此  
細民之愚無知抵死抵觸也朕甚不取自今以來有犯此  
者勿聽治

勸農詔

西山真氏曰按此議起於賈誼○愚曰古者重農務欲富民後世重農務欲富國周

公七月之詩富民也商君農穀之賞富國也文帝終身勸農而十數年間藏租稅者再除租稅者一真心在民不但勸之而又富之若帝但務富強則租不復減矣帝之勸農與秦之君臣富國者不同

漢文帝

本紀是年正月詔曰農天下之本其開籍田朕親率耕以給宗廟粢盛九月遂

下此詔

農天下之大本也民所恃以生也而民或不務本而事末故生不遂朕憂其然故今茲親率羣臣農以勸之其

賜天下民今年田租之半

勸農詔

西山真氏曰文帝即位十三年間減租

及之者豈非躬行節儉之效歟按此議起於晁錯○林之竒曰文帝以富庶之業始於賈誼成於晁錯誼則言願墾民而歸之農使天下各食其力文帝感悟耕籍田以為農先而務農之詔無歲無之矣錯之勸帝令民入粟以多少級數而拜爵文帝感悟賜民田租之半盡除田租之詔自此而屢下矣然則文帝之致此者豈非二人之力哉

漢文帝

本紀十二年二月

道民之路在於務本朕親率天下農十年於今而野不



加辟歲一不登民有飢色是從事焉尚寡而吏未加務也吾詔書數下歲勸民種樹而功未興是吏奉吾詔不勤而勸民不明也且吾農民甚苦而吏莫之省將何以勸焉其賜農民今年租稅之半

明年六月詔曰農天下之本務莫大焉今厘身

從事而有租稅之賦是謂本末者無以異也其於勸農之道未備其除田之租稅賜天下孤寡布帛絮各有數

### 置三老孝悌力田常員詔

愚曰善治天下者正其本不善治天下者正其

末夫禮義明則無倒戈之憤氣力裕則無輟耕之嘆人情然也故七月陳王業之艱難二典陳五教之以弼帝王治國以道不以術皆從人心風俗根本上求漢惠帝四年置孝悌力田復其

身呂后置孝悌力田二千石至文帝復有常官蓋識王道規模矣世或謂文帝富而不能教夫力田者是富之之術也孝悌者是教之之術也況帝專務以德化民海內興於禮義不以言教又以身教奈何諄諄語之風不免也

漢文帝

十二年

孝悌天下之大順也力田為生之本也三老衆民之師也庶吏民之表也朕甚嘉此二三大夫之行今萬家之縣云無應令豈實人情是吏舉賢之道未備也其遣謁者勞賜三老孝者帛人五匹悌者力田二匹庶吏二百

石以上率百石者三匹及問民所不便安而以戶口率置三老孝悌力田常員令各率其意以道民焉

### 除肉刑詔

陳傳良曰以一女子言改百年帝王之故典非甚勇不及此謂之仁可也○葉

適曰漢文帝因一女子喟然興嘆遂易三代之肉刑當時論刻肌膚斷肢體終身而不息何其刑之痛而不德也此最得肉刑緊急處然人之一念無窮朝為夷齊暮為桀跖豈可便為定據因其有罪遽加之刑要非天理漢文雖不得以帝王之事望之惟是除肉刑之法開後世仁起之端輕刑之原保全天下之民雖堯舜禹湯文有所不及也○陳季雅曰古人肉刑之法所以使民易避而難犯凡其有罪三罰三罰始恥諸嘉石役諸司空歸諸園土苟至於化之不從威

之不格怙終而不悛者始加明刑其罪可生者  
皆從墨劓剕宮之制其不可生者始從大辟之  
誅蓋未聞其遽施刑於民也故人知自愛而重  
於犯法夫以古人用法若此而文帝乃以為可  
畏易之以笞法殊不知此法一立上之人便輕  
用了下之人便輕易犯了所以流弊有不可救  
者或者謂文帝除肉刑苟為未善何以致刑錯  
之風按刑法志文帝由刑之除乃在於刑錯之  
後自是而下以致人冒法而文書盈於几閣不  
足以勝姦○愚曰古者風俗淳故肉刑雖立而  
犯者少後世風俗澆故肉刑既立而犯者多太  
宗曰不肉刑不井田不封建而欲治天下者不  
可得也夫肉刑本非聖人作也劓刵掾黥苗民  
五虐之刑也聖人以此報之耳古制不悛如井  
田封建者不少豈但肉刑哉秦漢之後犯法滋  
多恐非一太倉令止也文帝除之特感於一時

之弊況刑措不用則肉刑存否於一時亦何損益哉太宗之言未足窺漢文之心

漢文帝

本紀五月刑法志云齊太倉令淳于公有罪當刑詔獄逮繫長安其少女緹縈

隨父至長安上書請没入為官婢以贖父刑罪書奏天子憐悲其意下令

蓋聞有虞氏之時畫衣冠異章服以為戮而民弗犯何治之至也今法有肉刑三

孟康曰黥劓二刑左右趾合一凡三也

而姦不

止其咎安在哉乃朕德之薄而教不明與吾甚自愧故夫訓道不純而愚民陷焉詩曰愷弟君子民之父母今人有過教未施而刑已加焉或欲改行為善而道亡繇至

朕甚憐之夫刑至斷肢體刻肌膚終身不息何其刑之痛而不德也豈稱為民父母之意哉其除肉刑有以易之及今罪人各以輕重不亡逃有年而免具為令

丞相張倉御史

大夫馮敬奏言云云制曰可

### 增祀無祈詔

西山真氏曰按十三年夏詔曰蓋聞天道禍自怨起而福繇德興百官之

非皆由朕躬今祕祝之官移過於下以彰吾之不德朕甚不取其除之文帝過則自歸福則衆共古帝王用心也○愚曰文帝於鬼神之事雖不免寓意亦未嘗留意夫帝於鬼神之祠非一祠渭陽矣祠長門矣祠五帝矣幾若溺於虛誕者後新垣平獻玉杯而以詐誅公孫臣議服色

而以急止凡天下祠祭領以祠官帝不復往非若武帝求蓬萊廣臺館迷而不知反者嗚呼帝嘗問誼言鬼神之事矣至是無乃有悟於心乎今茲增祀無祈之語即前時因豐年祀上帝意也可謂寓意而不留意

漢文帝

本紀十四年春

朕獲執犧牲珪幣以事上帝宗廟十四年於今歷日彌長以不敏不明而久撫臨天下朕甚自愧其廣增諸祀壇場珪幣昔先王遠施不求其報望祀不祈其福右賢左戚先民後已至明之極也今吾聞祠官祝釐億皆歸

福於朕躬不為百姓朕甚愧之夫以朕之不德而專鄉  
獨美其福百姓不與焉是重吾不德也其令祠官致敬  
無有所祈

議佐百姓詔

愚曰文帝一意在民雖久而不改帝在位幾年矣佐民未嘗不至獨後元復議佐之何也夫減租佐其力也勸農佐其時也振瞻養老佐其貧且老者也甚者佐之以和親而不傷其生佐之以節儉而不損其財佐之以析福而不天其壽其佐之如此而復使丞相列國議佐之之策嗚呼帝愛民之心蓋愈久而愈不改者

漢文帝

本紀後元  
年三月



間者數年比不登又有水旱疾疫之災朕甚憂之愚而  
不明未達其咎意者朕之政有所失而行有過與乃天  
道有不順地利或不得人事多失和鬼神廢不享與何  
以致此將百官之奉養或廢無用之事或多與何其民  
食之寡乏也夫度田非益寡而計民非加益

度謂量計

以口

量地其於古猶有餘而食之甚不足者其咎安在無乃

百姓從事於末以害農者審

末謂工商之業

為酒醪以靡

靡穀

者多

靡散也

六畜之食焉者衆與細大之義吾未能得其

中

於仲反

其與丞相列侯吏二千石博士議之有可以佐

百姓者率意遠思無有所隱

與匈奴和親詔

朱黼曰文帝於備邊一事未嘗少忽雖恬靜玄然而躬騎射之習雖

慈祥淡泊而甘遊獵之娛雖尊禮大臣而方正  
常侍之士日與馳逐雖勤恤民隱而六郡良家  
之子悉皆調集雖愛惜財用而繕修城堡未嘗  
靳費衛軍罷矣而廣武之兵猶聚也苑囿弛矣  
而上林之射不息也高祛一言李齊之賢每飯  
不忘馮唐一論頗牧之善拊髀稱嘆晁錯一奏  
邊事璽書褒美請徙民守塞則募徙民請入粟  
實邊則詔入粟凡二十三年之間其商畧區畫  
捨農桑外所深著意者獨邊事而已然其卑詞  
屈己歲致金繒與犬羊結好者豈得已哉帝亦

度匈奴桀驁之執未可以遂服而瘡痍甫定之民未可以遂用故雖外為和親之禮而實在內未嘗輕弃自治之策帝於是憤怒激烈銳志雪恥屯兵三郡親御六飛勞軍勒兵申教令賜士卒必欲躬自北伐雖羣臣之諫不聽豈非仁者之勇哉使太后不固要之而帝與六將軍之兵果得臨敵當必痛懲而大治之使之終身創艾矣○愚曰帝之和匈奴何仁而不悟也夫夷狄之欲甚無厭也可以德柔可以力屈不可專以利誘若一切挾金繒誘之吾懼利有限而欲無厭未可恃此為固也且以帝之時較論戰者凡幾和者又凡幾三年匈奴嘗入寇矣遣灌嬰擊之而走十四年匈奴又入寇殺都尉印矣遣張相如等擊之而走後元六年又入上郡矣遣周亞夫等禦之而退是戰未嘗不勝也六年冒頓死嘗請和親矣至十一年而有狄道之寇後元

二年亦和親矣至六年而有雲中之寇是和未嘗可恃也  
翊帝之時未嘗無具也絳灌可將也南北可軍也富庶可財而三表五餌可術也內為天保以上之規模外為扶杜出車之備且乘隙而用之孰至以天下之大而畏人者而帝一切以和親為常此固賈誼所以痛哭流涕於斯也帝何不悟哉

漢文帝

本紀後元二年六月

朕既不明不能遠德使方外之國或不寧息夫四荒之外不安其生

夷狄荒服故曰四荒

封圻之內勤勞不處

圻亦畿不處不獲安

居二者之咎皆自於朕之德薄而不能達遠也間者累

年匈奴並暴邊境多殺吏民邊臣兵吏又不能諭其內  
志以重吾不德夫久結難連兵中外之國將何以自寧  
今朕夙興夜寐勤勞天下憂苦萬民為之惻怛不安未  
嘗一日忘於心故遣使者冠蓋相望結轍於道韋氏曰使車還  
故轍如結也以諭朕志於單于今單于反古之道計杜稷之  
安便萬民之利新與朕俱弃細過偕之大道結兄弟之  
義以全天下元元之民和親以定始于今年

遺詔

致堂胡氏曰文帝詔今所諭者謂吏民爾太子嗣君豈吏民與而景帝冒用此文乃自短

三年之制是不為君父服斬衰從景帝始也其  
罪如何三年之喪自天子達堯舜三代率由此  
道君者民之倡也立愛先親民尚不化已先忘  
孝何以率人乎且著為禮文則有不戒之重制  
為刑辟則有匿服之誅乃不以身先之禮必不  
行而刑必不服矣且天子所以不遵服三年者  
何謂哉謂妨政事則政事孰先於國家之大憂  
謂費財用則不得不可以為悅財用固所以行  
禮也謂防攝政之人則自堯舜至周末未聞有  
攝政之人而奪喪君之國者至於為小人嫁娶  
祠祀之政則用輕廢重尤為不倫不法堯舜三  
代乃安然以刻薄之景帝為師是不知禮義之  
為大也寥寥千餘年間惟晉武欲行古制而泥  
於裴杜之邪說獨魏孝文天性仁厚斷以不疑  
可謂夷狄之有君不如諸夏之亡者豈不惜哉  
○西山真氏曰高帝無遺詔景武以後亦不復

有蓋特出帝意而非故事也觀其詞非知死生之說者不能孰謂帝不知學乎○愚曰人心至終而後見況生死之際乎成王心純乎理故曰貢非幾之語未嘗背道魏武心純乎欲故分香賣履之事皆是為欲何也其心至此有不掩焉故也文帝此詔非但了死生之事而愛民惻怛溫乎言外故所短者在短喪所主者在仁愛入帝一念之真安以死生二之哉

漢文帝

本紀七年夏六月  
帝崩於未央宮

朕聞之蓋天下萬物之萌生

曰萌  
始生

靡有不死死者天地

之理物之自然奚可甚哀當今之世咸嘉生而惡死厚  
葬以破業重服以傷生吾甚不取且朕既不德無以佐

百姓今崩又使重服久臨以罹寒暑之數哀人父子傷  
長老之志損其飲食絕鬼神之祭祀以重吾不德謂天  
下何朕獲保宗廟以眇眇之身託於天下君王之上二  
十有餘年矣賴天之靈社稷之福方內安寧靡有兵革  
朕既不敏常畏過行以羞先帝之遺德惟年之久長懼  
于不終今乃幸以天年得復供養于高廟朕之不明與  
嘉之其奚哀念之有

顏氏曰帝自言或者宜見朕之不  
明乎以不可嘉為嘉耳然朕自謂

得終天年供養  
高廟為可嘉耳

其令天下吏民令到出臨三日皆釋服



無禁取婦嫁女祠祀飲酒食肉者自當給喪事服臨者

皆無踐

漢詔作跣  
跣徒跣也

經帶無過三寸毋布車及兵器毋發

人男女哭臨宮殿宮殿中當臨者皆以旦夕各十五舉

聲禮畢罷非旦夕臨時禁毋得擅哭臨已下

謂下版  
於虛也服

大紅十五日小紅十四纖七日釋服

當言大功小功布  
也纖細布衣也顏

氏曰紅與功同文帝自率己意為之  
非有取於周禮何謂以日易月乎

他不在令者皆以

此令比率

語類

從事布告天下使明知朕意霸陵山川如

其故毋有所改

立孝文廟樂舞詔

愚曰人之行事最不能掩其實夫以樂舞之立乃後人摹寫功

德光昭前烈者也景帝紀孝文行事若減刑恤孤聞者第識其為是宣帝紀孝武行事若窮兵淫祀聞者第彰其為非嗟夫一時之所為不掩萬世之清議如印印泥若此而況韶武之盡善與否千載之下有知之者至武前韶漢季札固視其德之淺深何如而可掩乎

漢景帝

元年

蓋聞古者祖有功而宗有德制禮樂各有由歌者所以發德也舞者所以明功也高廟耐直救奏武德文始五

行之舞孝惠廟耐奏文始五行之舞孝文皇帝臨天下

通關梁不異遠方除誹謗去肉刑賞賜長老收恤孤獨

以遂羣生減耆欲不受獻罪人不帑

讀與帑同蘇林曰刑不及妻子

不

誅亡罪不私其利也除宮刑出美人重絕人之世也朕

既不敏弗能勝識此皆上世之所不及而孝文皇帝親

行之德厚侔天地利澤施四海靡不獲福明象乎日月

而廟樂不稱朕甚懼焉其為孝文皇帝廟為昭德之舞

以明休德然后祖宗之功德施於萬世永永無窮朕甚

嘉之其與丞相列侯中二千石禮官具禮儀奏

丞相臣嘉等奏

高皇帝廟宜為帝者太祖之廟孝文皇帝廟宜為帝者  
太宗之廟天子宜世世獻祖宗之廟請宣布天下制曰可

### 徙民寬大地詔

愚曰甚矣人主不可無家法也以  
景帝天資慘覈而初年下徙民寬

鄉之詔三年下頒繫老幼之詔後元年又下獄  
詔後二年又下二十石修職之詔嚴於待臣  
而寬於待民蓋朝夕習聞乃翁寬厚之政故慘  
覈氣質或為之化故嘗曰漢之景帝與唐之高  
宗皆守成之主也景帝恭儉之政自太宗家法  
中來高宗恭儉之政自太宗家法中來蓋冰生  
於水青出於藍  
其流不可易也

### 漢景帝

元年  
正月

間者歲比不登民多乏食天絕天年朕甚痛之郡國或

硤陘無所農桑繫畜

顏氏曰硤謂硤确瘠薄陘謂偏隘也繫謂食養之畜謂牧放也或

地饒廣薦草莽水泉利而不得徙其議民欲徙寬大者

聽之

如淳曰莊周云麋鹿食曰薦一曰草稠曰薦深曰莽

頌繫老幼等詔

西山真氏曰按刑法志云三年下詔云云至孝宣元康四年又詔諸

年八十非誣告殺傷人他皆勿坐至成帝鴻嘉元年定今年未滿七歲賊鬪殺人及犯殊死者上請廷尉以聞得減死合於三赦幼弱老眊之人此皆法令稍定近古而便民者也

漢景帝

三年

高年老長人所尊敬也鰥寡不屬逮者人所哀憐也其

著令年八十以上八歲以下及孕者未乳師朱儒當鞠

繫者頌繫之

顏氏曰頌讀曰容寬容之不桎梏

獄獄詔

朱黼曰人主用刑之寬嚴以意而不以令意欲尚寬雖不令而人自聽意欲嚴也雖

日號月詔而語人曰吾務仁恕吾惡苛刻人固不從矣景帝減笞法令定箠令詔治獄務寬治獄文致於法而心不厭者輒讞意非不美然所用之吏則乳虎也蒼鷹也太子以侵廟堧則中尉殺之不問丞相以買葬器則獄吏殺之不問御史大夫為國劃策則聽讐家併三族殺之不問問用刑如是而詔今日下何益哉

漢景帝

後元年正月

獄重事也人有智愚官有上下獄疑者讞有司有司所不能決移廷尉有令讞而後不當讞者不為失欲令治獄者務先寬

顏氏曰假令讞訖其理不當所讞之人不為過失

### 令二千石脩職詔

漢景帝

後二年四月

雕文刻鏤傷農事者也錦繡纂組害女紅者也

顏氏曰紅讀曰

功農事傷則飢之本也女紅害則寒之原也夫飢寒並至而能亡為非者寡矣朕親耕后親桑以奉宗廟粢盛

祭服為天下先不受獻減太官省繇賦欲天下務農蠶  
素有畜積以備災害彊毋攘弱衆毋暴寡老者以壽終  
幼孤得遂長今歲或不登民食頗寡其咎安在或詐偽  
為吏吏以貨賂為市漁奪百姓侵牟萬民李氏曰牟食苗根蟲縣  
丞長吏也姦法與盜盜李氏曰姦法作姦也顏氏曰與盜盜者共盜為盜耳甚無  
謂也其令二千石各脩其職不事官職耗亂者丞相以  
聞請其罪布告天下使明知朕意

禁采黃金珠玉詔

愚曰人主為政貴實不貴華貴儉不貴侈景帝在位十六年事



事遵文帝之家法自平七國之亂而兵未嘗妄用自建原廟之祀而神未嘗妄祠自作陽陵之舉而役未嘗妄興至於重農桑禁珠玉務本菲實又直有後元天子遺意故帝所病者天資之慘刻所長者政事之真實史以文景並言懿哉

漢景帝

三年正月

農天下之本也黃金珠玉飢不可食寒不可衣以為幣用不識其終始間歲或不登意為末者衆農民寡也其令郡國務勸農桑益種樹可得衣食物吏發民若取庸采黃金珠玉者坐臧為盜二千石聽者與同罪

欽定四庫全書

卷一

復高年子孫詔

愚曰漢代以敬老為法始於文帝成於武帝又盛於宣帝傳曰文王

發政施仁必先斯四者此猶有三代之遺風

漢武帝

建元元年四月

古之立教鄉里以齒朝廷以爵扶世導民莫善於德然則於鄉里先耆父奉高年古之道也今天下孝子順孫願自竭盡以承其親外迫公事內乏資財是以孝心闕焉朕甚哀之民年九十以上已有受鬻法

給米粟以為糜鬻之六反

為復子若孫令得身帥妻妾遂其供養之事

赦鴈門代郡軍士詔

愚曰讀武帝赦鴈門軍士之詔知帝之窮兵亦迫而後應

者也且世言武帝好神仙即位八年遣方士求蓬萊矣帝好土木即位三年即起上林苑矣獨是窮兵黷武荏苒十數年始憑怒震虎建元六年帝猶和親也元光二年馬邑之襲擊帝猶下羣臣議也今年寇上谷明年寇雲中當時詔令曰金幣文繡賂之甚厚單于待命加嫚侵盜無已至此則帝之用衛霍殆不能自己於斯者軍士之赦母乃為後來用兵張本與

漢武帝

漢書元光六年春匈奴入上谷殺畧吏民遣衛青出上谷公孫敖出代公孫賀

出雲中李廣出鴈門青至龍城獲首虜七百級廣敖失師而還詔云云

夷狄無義所從來久間者匈奴數寇邊境故遣將撫師

古者治兵振旅因遭虜之方入將吏新會上下未輯代  
郡將軍敖鴈門將軍廣所任不肖校尉又背義妄行弃  
軍而北少吏犯禁少小吏也用兵之法不勤不教將率之過  
也教令宣明不能盡力士卒之罪也將軍已下廷尉使  
理正之而又加法於士卒二者並行非仁聖之心朕聞  
衆庶陷害欲刷恥改行復奉正議厥路無繇其赦鴈門  
代郡軍士不循法者

議不舉孝廉者罪詔

陳季雅曰西漢不問是科目  
但可以入官與東漢是這般

科目方入得這官不同路溫舒為獄吏亦可以  
應孝廉丙吉為獄掾而可與魏相同心輔政此  
西漢流品所以雜也若東漢不然諸生試家法  
大吏課牋奏其制為甚拘○愚曰武帝刻於待  
民而厚於待士舉茂材舉孝廉舉賢良莫不有  
詔獨孝廉猶近周族師書孝悌睦婣黨正書德  
行道藝遺意不專尚言語文辭者第為人上者  
養其行於先故得其人於後帝多利欲何以率  
下又無成周教養之法自元光詔郡國各舉孝  
廉一人至元朔廿六年竟不舉一乃詔議罪帝  
亦可以自省矣後非得王吉路溫舒輩自此選  
出則帝將何如噫舉孝廉濁如泥則責在上不  
專在下也帝待士以厚  
不能養士以厚惜哉

漢武帝

元朔元年  
十一月

公卿大夫所使總方畧壹統類廣教化美風俗也夫本  
仁祖義褒德祿賢勸善刑暴五帝三王所繇昌也朕夙  
興夜寐嘉與宇內之士臻於斯路故旅耆老

如惠耆老  
若賓旅也

復孝敬選豪俊講文學稽參政事祈進民心深詔執事  
興廉舉孝庶幾成風紹休聖緒夫十室之邑必有忠信  
三人並行厥有我師今或至闔郡而不薦一人是化不  
下究而積行之君子雍於上聞也二千石官長紀綱人  
倫將何以佐朕燭幽隱勸元元厲蒸庶崇鄉黨之訓哉

且進賢受上賞蔽賢蒙顯戮古之道也其與中二千石

禮官博士議不舉孝廉者罪

有司奏議曰古者諸侯貢士一適謂之好德再適謂

之賢賢三適謂之有功乃加九錫不貢士一則黜爵再則黜地三而黜爵地畢矣夫附下罔上者死附上罔下者刑與罔罔政而無益於民者斥在上位而不能進賢者退此所以勸善黜惡也今詔書令二千石舉孝廉所以化元元移風俗也不舉孝不奉詔當以不敬論不察廉不勝任也當免奏可

封丞相弘詔

愚曰君臣相與誥詠者易合剛正者難授仲舒公孫弘同治春秋也同以

賢良文學策者也弘自博士六年入相封侯而仲舒為左官相諸侯王竟不能安身漢朝之上於此可見史謂弘與仲舒俱以儒學飭吏事弘不但能欺君又能欺史臣矣

漢武帝

漢書元朔三年十一月弘代薛澤為丞相先是漢帝以列侯為丞相唯弘無爵

於是下

詔封

朕嘉先聖之道開廣門路宣招四方之士蓋古者任賢而序位量能以授官勞大者厥祿厚德盛者獲爵尊故武功以顯重而文德以行褒其以高城之平津鄉戶六百五十封丞相弘為平津侯

其後以為故事至丞相封自弘始也

報公孫弘詔

漢武帝



古者賞有功褒有德守成上文遭禍右武未有易此者也朕夙夜庶幾獲承至尊懼不能寧惟所與共為治者君宜知之蓋君子善善及後世若茲行常在朕躬君不幸罹霜露之疾何恙不已乃上書歸侯乞骸骨是章朕之不德也今事少閒君其存精神止念慮輔助醫藥以自持

令禮官勸學詔

愚曰禮樂興於漢而亦壞於漢夫定天下之分者禮也動天下之和

者樂也其所以本之者有道而非聲音動作之末者也三代禮樂絕於秦至漢武稍知興復如

紀寬講封禪趙綰草巡狩司馬相如為詩賦李延年協律雖慕其名未究其實當時齊魯諸儒間有存者在廷有一董仲舒亦可語禮樂而帝不能用乃以付之寬綰數子吾知帝不足論禮樂矣元朔之詔曰舉遺興禮以為天下先意帝不能知人亦豈足任考文制度之事

漢武帝

五年六月

蓋聞導民以禮風之以樂今禮壞樂崩朕甚憫焉故詳

延天下方聞之士

方道也聞博聞也

咸薦諸朝其令禮官勸學

講議洽聞舉遺興禮以為天下先

舉遺逸之文而興禮樂

太常其

議予博士弟子崇鄉黨之化以厲賢材焉

丞相弘請為博士置弟子

員學者

益廣焉

遣謁者巡行詔

愚曰人主有意恤民未遣使而民已被其惠人主無意恤民雖遣使

而民不被其惠嗟夫咨牧以食哉惟時舜未嘗待遣使也四牡而周爰咨詢周未嘗不遣使也而當時為民之盛心則千載如一也武帝遣謁者巡行其舜耶其周耶帝自元朔以來兵役並興賦歛日倍民且狼顧雖日遣巡行之使於民竟何益哉吾嘗考帝之遣使有二元狩遣謁者巡行不過察反側之心六年遣博士巡行不過舉兼井之徒其意果真在民耶

漢武帝

元狩元年四月

朕聞咎繇對禹曰在知人知人則哲惟帝難之蓋君者

心也民猶支體支體傷則心惜怛日者淮南衡山修文

學流貨賂兩國接壤怵於邪說而造篡弒

顏氏曰怵誘也音如戌亥

之成非怵  
惕之怵

此朕之不德詩云憂心慘慘念國之為虐已

赦天下滌除與之更始朕嘉孝弟力田哀夫老眊孤寡  
鰥獨或匱於衣食甚憐閔焉其遣謁者巡行天下存問  
致賜曰皇帝使謁者賜縣三老孝者帛人五匹鄉三老  
弟者力田帛人三匹年九十以上及鰥寡孤獨帛人二  
匹絮三觔八十以上米人三石有免失職使者以聞縣

鄉即賜無贅聚

顏氏曰即就也各遣就其所居而賜之勿會聚也

遣博士循行詔

西山真氏曰按食貨志令縣官銷半兩錢更鑄三銖錢皆以興利而

褚大等之出亦為舉兼并之徒是時張湯方用事蓋其所建請也而此詔乃以存間鰥寡舉獨行為之詞豈其誠哉存此以見武帝詔令大抵出於空文非高文此也

漢武帝

元符六年六月

日者有司以幣輕多姦農傷而末衆又禁兼并之塗故

改幣以約之稽諸往古制宜於今廢期有月

期音莽莽有餘月矣

而山澤之民未諭夫仁行而從善義立則俗易意奉憲

者所以導之未明與將百姓所安殊路而矯虔吏因乘勢以侵蒸庶邪何紛然其擾也今遣博士大等六人分循行天下存問鰥寡廢疾無以自振業者貸與之諭三老孝弟以為民師舉獨行之君子徵詣行在所朕嘉賢者樂知其人廣宣厥道士有特招使者之任也詳問隱處亡位及冤失職姦猾為害野荒治苛者舉奏郡國有所以為便者上丞相御史以聞

遣博士循行詔

漢武帝

元鼎二年九月

仁不異遠義不辭難今京師雖未為豐年山林池澤之饒與民共之今水潦移於江南迫隆冬至朕懼其飢寒

不活江南之地火耕水耨

燒草下水種稻草與稻並生高七八寸因悉芟去復下水

灌之草死獨稻長所謂火耕水耨

方下巴蜀之粟致之江陵遣博士中

等分循行諭告所抵無令重困吏民振救飢民免其危

者具舉以聞

造太初歷詔

愚曰三統循環更迭為首此特三代隨時之義漢用顓頊歷而一遵泰正

賈誼言之素矣。綿亘百二歲之久，恬不之易。元封七年之詔，其元運升降之會乎？嗟夫！五勝相承，漢一秦也。縱曰朔晦無愆，漢何如耶？後漢尚書令有云：四分太初，歷是非已定，兩歷相課，六千一百五十六歲，太初多一日，冬至日直斗而云牽牛迂闊，不可復用。夫以天道之變更，日月之晦蝕，新故相涉，自不得不有毫末之失。一日之差，洛下閎已預計於八百年之前，又豈特延光之議，而後知噫！此歲差之法，所由起也。

### 漢武帝

漢律歷志：漢興，襲秦正朔，以北平侯張蒼言，用顓頊歷，至元封七年，漢興百二

歲矣。大中公孫卿壺遂、太史令司馬遷等言：歷紀壞廢，宜改正朔。是時御史大夫倪寬明經術，上乃詔寬曰：與博士共議。今宜何以為正朔服色？何上寬與博士賜等議，皆曰：



帝王必改正朔易服色所以明受命於天也  
創業變改制不相復推傳序文則今夏時也  
臣愚以為三統之制後聖復前聖者二代在  
前也今二代之統絕而不序矣唯陛下發聖  
德宣考天地四時之極則順陰陽以定大明  
之制為萬世則於是乃詔御史曰云云以七  
年為太初元年夏五月造太初歷以正月為  
歲首色上黃數用五定官名協音律定宗廟百  
官之儀以為典常垂之後  
世○時太初元年夏五月

乃者有司言星度之未定也廣延宣問以理星度未能

詹也

詹一作售漢書  
作讎讎即售也

蓋聞昔者黃帝合而不死名察驗

察定清濁起五部建氣物分數

言黃帝造歷得仙名節  
會察寒暑致啟閉分至

定清濁起五部五部金木水火土也建氣物分數皆叙應之意然蓋尚矣書缺樂弛朕

甚閔焉朕唯未能循明也紬績日分紬亦音宙績也率應水德

之勝

蓋以為應土德勝水德

今日順夏至黃鍾為宮林鍾為徵太

簇為商南呂為羽姑洗為角自是以後氣復正羽聲復清名復正變以至子日當冬至則陰陽離合之道行焉十一月甲子朔旦冬至已詹其更以七年為太初元年

止田輪臺等詔

止齋陳傳良曰武帝悔甚晚秦穆公能改過孔子錄其誓者與人遷

善也武帝初年氣陵宇宙晚年變故屢興天下大亂於是年老英心減矣是以能悔文中子曰

秋風歌其悔心之萌乎○西山真德秀曰按此武帝悔過之書也其事有四益民賦一田輪臺二募囚徒送匈奴使者三明封侯賞以報怨四方帝志盛氣壯時聞羣臣此請必銳然從之矣更變知難乃始悔艾時帝之齒已六十九雖從義弗早然漢家社稷幾危而復安實有賴焉方諸呂刑秦誓蓋彷彿其遺意云又食貨志言武帝末年悔征伐之事乃封丞相為富民侯時下詔曰方今之務在於力農以趙過為搜粟都尉過能為代田一畝三畦歲代處故曰代田古法也即此時事云

### 漢武帝

漢西域傳自武帝初通西域置校尉屯田渠犂是時軍旅連出師行三十二年

海內虛耗征和中貳師將軍李廣利以軍降匈奴上既悔遠征伐而搜粟都尉桑弘羊與

丞相御史奏言故輪臺以東樓枝渠犂皆故  
國地廣饒水草有溉田五千頃以上處溫  
田美可益通溝渠種五穀與中國同時熟  
其旁國少錐刀貴黃金采繒可以易穀食  
宜給足臣愚以為可遣屯田卒詣故輪臺  
以東置校尉三人分護各舉圖地形通利  
溝渠務使以時益種五穀張掖酒泉遣騎  
候屬校尉事有便宜因騎置以聞田一歲  
有積穀募民壯健有累重敢徙者詣田所  
就畜積為本業益墾溉田稍築列亭連城  
而西以威西國輔烏孫為便臣謹昧死請  
上乃下詔深陳既往之悔曰云云

前有司奏欲益民賦三十助邊用

每口增三十錢

是重困老弱

孤獨也而今又請遣卒田輪臺輪臺西於車師千餘里

前開陵侯擊車師時

開陵侯匈奴降者

危須尉犂樓蘭六國子

弟在京師者皆先歸發畜食迎漢軍又自發兵幾數萬

人王各自將共圍車師降其王諸國兵使罷力不能復

至道上食

副

漢軍漢軍破城食至多然士自載不足以

竟師強者盡食畜產羸者道死數千人朕發酒泉驢橐

駝負食出玉門迎軍吏卒起張掖不甚遠然尚所留甚

衆

所留言其前羈所不相連故也音斯

曩者朕之不明以軍候弘上書言

匈奴縛馬前後足置城下馳言秦人我匈奴若馬

匈奴與也又

漢使者久留不還故興師遣貳師將軍欲以為使者威重也古者卿大夫與謀參以蓍龜不吉不行乃者以縛馬書徧視丞相御史二千石諸大夫郎為文學者乃至郡屬國都尉成忠趙破奴等皆以虜自縛其馬不祥甚哉或以為欲以見彊夫不足者視人有餘易之卦得大過爻在九五匈奴困敗公車方士太史治星望氣及大卜龜蓍皆以為吉匈奴必破時不可再得也又曰北伐行將於蒲山必克卦諸將貳師最吉故朕親發貳師下

黼山詔之必毋深入今計謀卦兆皆反繆重合侯得虜  
候者言聞漢軍常來匈奴使巫埋羊牛所出諸道及水  
上以誑軍單于遣天子馬表常使巫祝之縛馬者誑軍  
事也又卜漢軍一將不吉匈奴常言漢極大然不能

明

飢渴失一狼走千羊乃者武師敗軍士死略離散悲痛  
常在朕心今請遠田輪臺欲起亭隧是擾勞天下非所  
以優民也今朕不忍聞大鴻臚等又議欲募囚徒送匈奴  
使使者明封侯之賞以報忿五伯所弗能為也

按大鴻臚不知

為誰當考

且匈奴得漢降者常提掖搜索問以所聞今邊塞

未正闌出不禁障候長吏使卒獵獸以皮肉為利辛苦

而烽火乏失亦上集不得

邊塞有闌出逃亡之人主者不禁又長吏私於皮肉多使

障候之卒獵獸故令烽火有乏又其人勞苦因致逃亡凡有此失皆不集所上文書

後降者來若

捕生口虜乃知之

既不上書後有降者來及捕虜生口言之乃知此

當今務在

禁苛暴止擅賦力本農修馬復令


馬復因養馬以免徭賦也

以補闕

毋乏武備而已郡國二千石各上進畜馬方略補邊狀

與計對





文選補遺卷一